

এসএসসি-এইচএসসির গ্রেডিং

৯১-১০০ নম্বরের
ধাপ নিয়ে
বিড়ম্বনার আশঙ্কা

স্টাফ রিপোর্টার ॥ এসএসসি এবং এইচএসসি পরীক্ষার খাতা-মূল্যায়নে গ্রেডিং পদ্ধতি নিয়ে বিভ্রান্তি সৃষ্টি হয়েছে। বিশেষ করে ৯১ থেকে ১০০ নম্বরের কোন ধাপ থাকবে কিনা এবং থাকলে ছেলেমেয়েরা কিভাবে এ প্রাস পাবে তা নিয়ে মেধাবী ছাত্রছাত্রীদের উদ্বেগ-উৎকণ্ঠার শেষ নেই। কারণ বাংলা, ইতিহাস থেকে শুরু করে এমন কয়েকটি বিষয় আছে যেগুলোতে ৯১ থেকে ১০০ নম্বর পাওয়া পুরোপুরি অসম্ভব। আর দশটি বিষয়ের কোন

(৭ পৃষ্ঠা ১-এর কঃ দেখুন)

৯১-১০০ নম্বরের ধাপ (প্রথম পাতার পর)

একটিতে ৯১-এর কম পেলে এ প্রাস হাতছাড়া হয়ে যাবে।

এ ব্যাপারে ঢাকা বোর্ডের চেয়ারম্যান প্রফেসর মুহাম্মদ জুনাইদ বলেন, আমরাও চাই না ৯১ থেকে ১০০ নম্বরের ধাপ। কারণ আমরা ছেলেমেয়েদের অমঙ্গল চাই না। তিনি জানান, গ্রেডিং সিস্টেম সংস্কার করার সিদ্ধান্ত হয়েছে। কিন্তু কিভাবে এই সংস্কার হবে তা চূড়ান্ত হয়নি। চেয়ারম্যান আরও জানান, গ্রেডিং সিস্টেম সংস্কারের ব্যাপারে প্রস্তাব মন্ত্রণালয়ে পেশ করা হয়েছে। মন্ত্রণালয় সংশ্লিষ্ট সকলকে নিয়ে চূড়ান্ত সিদ্ধান্ত গ্রহণ করবে।

এদিকে এসএসসি এবং এইচএসসি পরীক্ষা শুরুর কয়েক মাস বাকি থাকতে গ্রেডিং সিস্টেম নিয়ে আলাপ-আলোচনা শুরু হওয়ায় পরীক্ষার্থীদের উৎকণ্ঠা বাড়ছে। এ প্রাস পেতে হলে সব বিষয়ে ৯১ থেকে ১০০ নম্বর পেতে হবে এমন খবরে মেধাবীদের মধ্যে ক্ষোভ সৃষ্টি হয়েছে। নাম প্রকাশে অনিচ্ছুক একজন অভিভাবক প্রশ্ন রেখেছেন, পরীক্ষার আগেভাগে ছেলেমেয়েরা পড়াশোনা করবে না গ্রেডিং নিয়ে ভাববে? তাঁর মতে, গ্রেডিং পদ্ধতি যদি সংস্কার করতেই হয় তাহলে তা খুব শীঘ্র করে পরীক্ষার্থীদের টেনশন থেকে মুক্তি দেয়া হোক।

জানা যায়, গত দু'বছর ধরে এসএসসি পরীক্ষায় 'এ প্রাস' পাবার জন্য নম্বরের ধাপ ছিল ৮০ থেকে ১০০ এবং 'এ' পাবার জন্য ধাপ ছিল ৬০ থেকে ৭৯। বিভিন্ন মহল থেকে ৬০ থেকে ৭৯ নম্বরের গ্যাপ ভেঙ্গে দু'টি করার প্রস্তাব ও দাবি উঠেছিল। তবে এ প্রাস অর্থাৎ ৯১ থেকে ১০০ নম্বরের গ্যাপ নিয়ে কোন বক্তব্য শোনা যায়নি। কিন্তু শিক্ষা মন্ত্রণালয় ছয়টি ধাপ ভেঙ্গে আটটি ধাপ করেছে এমন খবরের পরিপ্রেক্ষিতে ছাত্রছাত্রীরা উদ্বেগ ও হতাশ হয়ে পড়েছে। অবশ্য ঢাকা বোর্ডের চেয়ারম্যান বলেছেন, গ্রেডিং সিস্টেমের সংস্কার চূড়ান্ত হয়েছে বলে যে কথা বলা হচ্ছে তা ঠিক নয়।